

01 難忘的麵粉酥

陳雅菁

做囡仔的時，阮兜的巷仔頭到有一間糕仔餅店，見擺若經過遐，我攞會予伊芳 kòng-kòng 的芳味唸牢咧。伊的做法真心適，有人待佇大鼎頭前無閒咧搵麵粉，嘛有人佇鼎邊用麥芽糖摻小可仔油水，沓沓仔煊成麥芽膏。講到遮，你敢有臆著這項物件是啥物？無毋著，就是佇臺灣南部才看會著的「麵粉酥」。

趁麥芽膏燒滾滾的時，加入搵好的麵粉，繼落來就愛恰時間拚輸贏。佇潯糖蜜的麵粉猶未冷去進前，愛緊共捏做一隻龜的模樣，若等到麵粉無夠燒才來做，就會規个有冇碇碇，按呢就害囉！

會記得阮這陣囡仔攞會待踎門跤口，看頭家咧表演鐵砂掌。衝煙的麵粉酥佇伊的手頭敢若黏塗仝款，一觸久仔就變做一隻足大隻的龜。我恰厝邊的囡仔伴攞待踎壁邊，對今仔做好的龜金金相，精差喙瀾無津落來爾爾。頭家佇店內無閒頤頤，舞甲大粒汗、細粒汗，毋過若看著阮這陣楞饞的囡仔，就會提一塊仔予阮鼻芳，較好運的就會提著規大塊的。逐家你一喙、我一喙，做伙享受這味數想足久的好滋味。這馬想起來，特別懷念彼當時樸實的生活，厝邊隔壁的感情好甲剝袂離。

大漢了後才知影，原來麵粉酥干焦佇有人嫁娶抑是廟裡大拜拜的時才會出現，莫怪細漢的時陣，想欲食一喙麵粉酥，就愛看時看日。早期臺灣社會誠注重廟寺的文化，佇元宵節彼跤兜會有「乞龜」的儀式。佇廟埕看著大大細細的麵粉酥龜，是足四常的代誌。信眾會跋栢向神明請示，若有象栢才會當共龜請轉去。毋過時代的變化真緊，做麵粉酥的老功夫聊聊仔失傳，這馬真僇得看著矣。

頂擺轉去臺南，經過一間有歷史的糕仔餅店，目睷無意中影著麵粉酥做的素三牲，彼種厝邊頭尾燒唸唸閣甜物物的懷念隨對心肝頭潰出來，歡頭喜面趕緊共買來食。口味猶原酥酥脆脆、甜甜芳芳，是我的記持內底彼種古早味無毋著！

向頭看著囡仔桌仔頂零零星星的麵粉酥，我的心肝穎仔煞有一種講袂出來的悲傷。

02 阿母的裁縫車

黃正泓

厝內有一台車仔囡佇露台，誠久都毋捌振動過矣。五十冬前，這台車仔是阿母趁錢的家私，屨仔底囡補衫的家私頭仔：正手爿是針線、鉸刀、鑽仔；倒手爿有梭仔子、梭仔殼、粉塗……。

阮做囡仔的時，阿母用這台 mi-sín 共人改衫、補褲、換挽鍊仔，趁一寡囡仔的四秀仔錢。阿母若咧補衫，會共小弟囡仔奶母椅仔，我恰阿姊會倚佇邊仔看，阿母有時會叫阮鬥換布尺，有時會叫阮共插熨斗。小弟若哭，阿姊會共伊偕佇尻脊駢唔予睏。

學校散學的時，阿母佇灶竈煮食，車仔會崁咧，成做阮的寫字桌仔。若是拄著熱天，定定有金龜、牛角䟽仔飛入來厝裡。有一改我咧寫字，一隻烏色的「大蟬」歇佇窗仔內飛袂出去，我出手共掠，無疑悟彼隻「大蟬」煞對我的大拇翁叮落去。我哀一聲，當咧煮菜的阿母隨對灶竈從出來，彼時陣我疼甲目屎流目屎滴，哭講：「阿母，彼隻蟬共我叮……。」阿母講：「你這個戇囡，彼隻是蜂，毋是蟬啦！」無偌久規个手盤腫甲若麵龜，阿母聽厝邊兜講抹冬蜜會使退癢，就緊去搭一寡冬蜜予我抹。

有一冬過年前，阿爸領月給，阿母恁阮去夜市仔買衫，

逐家顧看衫，皮包仔煞拍毋見，毋知敢是予剪綹仔剪去。阿母揣甲心狂火著，規个擔仔位強欲予反過來，嘛是揣攏無，心肝有夠鬱卒。轉來厝裡，阿母一个人戇神戇神，坐跼車仔頭前。我揜佇巷路，毋知過偌久，阿母越頭看著，共我的頭殼摸摸咧，伊講：「無要緊，咱若骨力就免驚無錢通趁！」

前一站仔，一个開店的朋友來開講，看著這台古董，想欲出價共我買。伊講：「你囡仔厝裡用袂著，我想欲共伊站佇店內做藝術品。」我心肝內想，這台車仔有我囡仔時的記持：阿母跼踏仔踏落去，一針一線，共破去的所在補甲若一幅抽象畫；紡梭仔子的時，彼款噪人耳的聲音，親像猶閣佇耳空邊吱吱叫……。遮的形影恰聲音，攏敢若是昨昏才發生的全款，遐爾清楚牢佇我的心肝內，我哪有可能共五十外冬的思念賣擲揀咧！

03 醬菜車來矣

熊美德

六月火燒埔，天氣像火爐，三頓食袂落飯嘛變無步。有一工聽著「噹噹噹」的聲音，放送出：「手工古早味，無摻防腐劑的醬菜來囉！」一時好玄對樓頂共伊看落去，看著一个老先生揀醬菜車，車頂用紗網嵌咧，有足濟甕仔貯無仝的醬菜，我隨提甕仔落去共伊交關。才行倚去，就鼻著一陣一陣天然醬菜的芳味，嘛感受著往過囡仔時代的鄉土味。啊！就是這味啦！

我揀黃菜頭、豆乳、豆枝佻破布子，這是細漢和阿媽生活的記持。人客愈來愈濟，來交關的除了有淡薄仔年紀的，少年人嘛輸人毋輸陣，的心情親像發現古董，閣敢若是咧欣賞國寶，提手機仔拚勢翕相閣翕甲袂得通煞。看著這個情景我煞毋甘離開，頭家阿伯嘛笑微微，相信這醬菜予真濟人想起少年囡仔時。

轉到厝，阿孫的問講這是啥物？我講這是古早味，姨婆細漢的時陣，透早叫我起床的毋是雞啼，嘛毋是鳥仔聲，閣較毋是亂鐘仔，是醬菜阿伯的鈴仔聲。伊無論初一十五、透風落雨，攏會照顧逐家的腹肚，提供逐家配糜的醬菜。伊的醬菜毋但衛生好食、價數公道，閣足有人情味，是生理人也是好厝邊，嘛會和人客開講。伊記持真好，會記得

人客的口味佻需求。會記得對面的淑枝阿媽有一擺跲著傷，幾若工無法度出門，伊知影了後隨抖一碗伊上愛食的破布子去共伊關心，希望伊緊好起來，真正臺灣上孃的風景就是人。

阿孫仔聽我按呢講嘛欲落去看覓，我看著樓跲醬菜車猶佇遐，就隨恁阿孫的落樓。阿孫的真好喙，見面就叫一聲：「醬菜阿公！」這陣，人客漸漸散去，醬菜頭家講伊沓沓仔無體力通閣做這號無摻防腐劑的手工醬菜矣，猶毋過若想著食安問題，就予伊有想欲閣做落去的氣力。這馬便利商店雖然真利便，毋過人佻人之間上欠缺的猶是溫暖的關懷。

看著醬菜頭家揀醬菜車行開的身影，一个時代的回憶就欲成做歷史，煞有淡薄仔毋甘。有人講：「有記持才知珍惜。」我相信醬菜車的人情味，是咱真濟臺灣人往過共同的記持。

04 魚塭

王彥博

「喂！阿爸喔！你哪會這個時陣敲予我，我咧上課呢！」

「無啦！都想講共你關心一下！是講過年欲到矣，你當時欲轉來？」從我出外讀冊到今，阮阿爸三不五時就會敲電話予我，講是欲關心我，毋過我聽會出伊心肝內想欲表達啥。窮實我真久無轉去，可能伊嘛有淡薄仔想我，阮阿爸自本就慇直慇直閣預顛講話，所以誠僇用溫馴的口氣參阮開講，只好無意無意敲電話予我。

凡勢是因為伊細漢時的生活環境，予阮阿爸成做這款古意的個性，不而過有時伊嘛誠硬，尤其是對飼魚仔這層代誌，伊甘願家己顧前顧後，嘛毋願倩工共鬥相共，一直到彼改發生代誌，伊姑不而將才倩工來鬥做。

彼冬寒人，毋知啥物緣故，厝裡六窟魚塭仔攏予人毒毒，咧欲收的魚仔攏總反肚，阿爸聽著這個消息，隨騎 oo-tóo-bái 拚去塭仔，毋過煞因為傷過著急，無細膩摔落去大排水溝，致使伊正片的跤手骨折去。當然囉，彼冬辛辛苦苦飼的魚，就按呢全部害了了。

雖罔人無按怎，只要好好仔調養佢復健，跤手就會沓沓仔恢復。不而過魚塭仔著愛重整理過，才會用得放魚栽，

也佳哉我歇寒矣，會當共阿爸鬥跤手，若無，一家伙的三頓就無通維持矣。

予人毒毒的魚塭著愛倩專業人士來洩塭底，繼落去閣愛經過曝塭塗、反塗肉、透新水和水質消毒等等的工課，才通共魚栽放落去飼。毋但按呢爾爾，佇飼的過程當中，逐工天拄拍陪光，就愛起床去作穡，固定時間去放飼料，看 phòng-phù 有咧絞無，予我感覺著飼魚仔袂輸咧飼困咧。阿爸定咧講：「飼魚仔無遐簡單，當然嘛無遐涼勢。」我共阿爸鬥相共的彼個月，才知影伊的辛苦，嘛因為經過這層代誌，我才體會著生活的艱難。

歇寒欲結束矣，我嘛準備閣欲上北讀冊，不而過看著阿爸的行動無利便，我就共阿爸講，愛倩散工仔來鬥顧，你就好好仔調養，想袂到這擺阿爸隨就應好。

這馬，應該換我逐工敲電話來關心伊矣。

05 綿仔紙佢阮滾耍笑

賴又嘉

國際紙漿欲起價矣！綿仔紙的廠商放風聲講價數欲綴咧起。這個時陣，樓頂招樓跔、厝邊招隔壁、親情五十綴咧從……是欲去佢？逐家攏從對大賣場去囉！

紙漿會當做真濟物仔，是按怎獨獨是綿仔紙上敏感？原因是咧「趕緊」的時陣無伊就袂使得所致，電視若開開，逐工攏是咧報某乜賣場人映人，相爭搶綿仔紙。騎 oo-tóo-bái、駛自家用的來搬，當然是無夠看，li-á-khah 和貨車攏出動矣，才是厲害。毋知的人叫是欲相戰矣，消息無夠靈通的人叫是咧搬免錢的。我這個跤手慢鈍的人煞一粒頭兩粒大？我厝裡拄好賭一包，我嘛干焦想欲佢平常時全款揸一揸綿仔紙轉去，無疑悟，熟似的架仔頂哪會空空空，今，是咧按怎？

佇咱這個富裕的臺灣，民生用品講欲愛佻濟就有佻濟，生目睷嘛毋捌看過這狀況。鼻仔摸咧，閣來去別間看覓。就按呢，走過一間閣一間，也問過一舖過一舖，「無貨囉」逐間都是全款的回答。我一向誠樂觀，心內猶原想講無要緊，今仔日無，明仔載才閣來。講真的，連繼幾若工攏是加走的，我仙想都想無，是綿仔紙咧創治咱？抑是咧佢咱滾耍笑？頭一改買物件遮忝、遮無步，真正是有錢

煞無地買！

無奈何，愛敲電話討救兵囉。電話通矣，阿姊的大嚨喉空佇電話的彼爿傳過來：「都叫你愛趕緊，你看，我講甲準準，這馬恁兜愛學印度人全款用倒手拭……。」當然，阿姊上尾有允我，欲救濟我一揸綿仔紙。

當當我去阿姊遐，煞予規厝間的綿仔紙驚著，竟然排規排親像咧共我攞手，閣講：「阮是咧佢你滾耍笑的。」綿仔紙啊綿仔紙，咱莫閣耍矣，敢好？

代誌過去幾若個月矣，綿仔紙真正起價矣。彼工我閣去大賣場買日用品，刁故意撻去綿仔紙的架仔看看咧，這馬綿仔紙是窒倒街，欲愛啥物牌子的都有。欲結數的時，閣送我一包綿仔紙。手提這包綿仔紙煞予我起愛笑，底當時「你」哪會予人做伴手咧送？我沿路駛車沿路笑，綿仔紙若親像嘛知影，綴我同齊笑。

06 烘甜粿

Khóo Lé-too

這幾工天氣有較寒，透早有時仔較臨十度，連做工課都懶懶仔，予我無張持閣想起細漢的代誌。

會記得以早差不多二月天這個時陣，天氣真寒，過年了無佬久，厝裡猶閣賭真濟甜粿。有時仔阿母會潯粉用糲的，有時仔嘛會用煎的，毋過閣有一種方法就是用烘的。起火對我來講，是我上內行的工課。我先佇烘爐內底園一寡報紙，頂頭舒幾枝樹仔枝，火著了後就共火炭園咧上頂頭，葵扇擰咧開始攢，愈攢火愈猛，毋過愛小檢查火炭有著無。一般來講，火若猛，大部份攢會成功。聽候火起著，看火無咧薰了後，才共烘爐提入去厝內。

阮一陣囡仔就圍佇烘爐邊仔，開始烘甜粿。阿母會先共甜粿切做一塊一塊，了後逐家共鋪佇網仔頂頭，做伙那烘甜粿那共手骨烘予燒，有時仔嘛會一直掌手，掌一觸久仔手就開始燒烙起來。有一个囡仔實在真孽，雄雄共冰冰的手對後壁伸入去別人的尻脊骹，閣喝一句「電冰箱」，刁工共人創治，實在真害。甜粿予火烘了，會衝出一種特別的芳味，有時火若傷過炎會臭火焦，就愛提箸緊反引。若烘好勢，隨夾入去碗公內底，喙饞的囡仔就會緊用手捻一塊，隨共塞入去喙裡，食著燒唵唵閣黏喙齒的甜粿，攞

會那哺那歎風，毋過攞是喙笑目笑。天真健丟的囡仔所求無佬濟，按呢就感覺足滿足矣，會使講這就是一種簡單的幸福啊！

會記得彼陣我捌共阿爸問過講：「是按怎囡仔人尻川三斗火？」阿爸應講：「因為囡仔人出世進前，尻川內底就有三葩火。」阮聽了實在半信半疑。大漢了後，阮才了解，因為囡仔人活動力真強，而且氣血旺盛，所致身體好，尻川親像火爐仝款，不管時囡仔人的體溫都較懸，親像尻川有三斗火仝款。

一目瞞幾若十年過去矣，阮六个囡仔南北各蹣一位，難得一個月逐家見一擺面。彼下晡我來安養院看年老的阿母，伊已經失智矣，袂認得我是啥人，想著心肝頭真酸，忽然間又閣想起這層代誌，毋知恁逐家這馬攞有勇健無？

07 若欲嬌來去泗水

蔡天享

新聞不時咧報，身體若欲勇健、活跳，毋但三頓的食食誠要緊，運動閣較袂使無。毋過講若咧講，管都一枝長長、雙頭空空，有才調做甲到的人，點燈火嘛誠僇揣著。

我有一个五十外歲的朋友，人無佻大漢，帶一圈肚圓棍棍，九十外公斤重，入門的時，總是先看著伊的腹肚，才看著鼻目喙。工課誠無閒，閣愛佻客戶盤攪的緣故，伊三頓就無照時陣，逐不時都「一頓久久、兩頓相拄」，毋是龍蝦就是封肉，專油臊的，運動干焦掛佇喙裡，尾仔煞斷腦筋，一跤一手袂振動。

常在有人發願欲運動，不而過專是頭仔興興、尾仔冷冷的占較大面，道理是牽甲規山坪。人若招欲拍球，講：「莫啦！我預顛拍球，驚人笑啦！」無，就是講：「散步行路誠無局，袂久長啦！」根本都無致意欲做，莫怪腹肚若咧歎風，一暝大一寸。

若欲捷運動閣莫予斷站去，敢有好步數？我上瘦的時五十五公斤，捌大箍甲七十五，朋友講我福相，拍算是講我謙淳的客氣話。就按呢我堅心欲改頭換面，起初招伴拍乒乓，毋過兩個人不時門扇枋鬥袂峇，毋是伊出張袂當來，就是我落屎腹肚疼。招伴運動遮爾仔歹按

算，規氣就改來去泗水，家己一个人隨時就會當起行，攏免相等。

寢頭泗兩逝仔就怦怦喘，忝甲會呼雞袂歎火，佳哉我誠巴結，無越頭做我走，猶原逐禮拜去泗三五日。四跤仔泗是我的專門科，規身人覆佇水面，跤頭跌拗曲，大腿收來到腹肚尾，跤步才閣踢水共躡出去。仝彼个時陣雙手著愛向前伸予直，手涉擲水來到胸坎骨，順勢浮頭，開喙軟一下大氣，泗規公里的水路攏無歇喘。堅持三月日了後，跤後肚和手股操練甲不止仔束結。換褲的時，褲頭一直落落去，當時仔腰身減欲規寸矣。

泗水這項運動予我加足有精神的，到今五六冬矣，感冒、流鼻水都罕得來相揣，親情朋友拈倚來呵咾講：「你身體健康，行路有風喔！」我真自信共回：「好額毋值著會食，好命毋值著勇健。體格若欲嬌，咱做伙來去泗水！」

08 做生教組長的鉅角

廖啟助

聽著「生教組長」這個稱呼，你會想著啥？罵囡仔、掠囡仔、處理囡仔冤家相拍、偷提物件、定定愛做公親……。無毋著，這就是生教組長平常時仔愛做的工課。除了遮的，猶有足濟沓沓滴滴的代誌。若是你，你敢欲接？抑是講，你敢敢接這個職務？

挂開始主任揣我接這個缺的時，我先想著的是：我無法度像進前的生教組長全款，歹囡仔歹甲遐大聲。閣來就是，其實我足少咧罵囡仔，逐時去大聲歹囡仔，真正毋是我的 sū-tài-luh。按呢我敢有法度接這個缺？所以我就去請教一寡長輩，聽看的建議。

有一位序大對我講：「這確實是無輕可的工課，因為欲處理的攏是遮的歹剃頭、歹扭搦的學生。毋過就是因為一般的老師無法度處理，才需要咱來鬥跤手。這是一個會當幫助囡仔，閣會當替家己積福報的工課，所以我認為你愛把握這個機會。」另外一個主任對我講：「其實我認為你誠適合做這個組長，因為我看你過去焠班對囡仔的規矩、禮貌攏足注重，而且咱做老師的人，上重要的是教囡仔，毋是歹，啥人講做生教組長一定愛大聲去罵囡仔？」聽 按呢共我開破，才予我有信心通接這缺！

處理代誌的過程當中，我定定咧思考，敢有人無代無誌欲去共老師唱聲？抑是去拍人、罵人，偷提別人的物件？個是毋是有啥物委屈，抑是誤會，才會發生今仔日的結果？我若是激老師的派頭，學生敢會對我講個的心內話？所以便有需要我去處理佢囡仔相關的代誌，我攏先倚佇個的立場對個講：「老師毋是欲來罵人抑是處罰恁的，到底代誌按怎發生的，你安心仔共我講，老師來想辦法共恁鬥解決。」就按呢大部份我攏會當捎著摠頭，將結啟開，而且倚佇序大人佢老師的立場，鬥輔導遮的囡仔離經的想法佢行為。

咱敢有人愛予人罵？無，用罵的、用拍的，你敢真正會聽、會改？我想是較儂。將心比心，用耐心、愛心佢智慧來開破予咱的囡仔聽、掠個的心，相信咱攏會當來做生教組長喔！

09 阿嫂，加油！

陳秋貴

「阿姑仔，你轉來矣喔！」看我拄欲入門，你雙手誠出力，擱踎輪椅頂，準備欲起來迎接我。這個情景，予我心肝頭一陣痠軟，趕緊共你講：「阿嫂，你坐咧就好。」

捌聽老輩咧講，爸母若是無去了後，後頭厝這條路就會斷去。毋過，阿嫂，你無予這條路斷去。佇阿爸阿母過身了後，你猶閣共這條路摸牢咧。見若過年過節的時，你就電話一直敲，叫阮遮的大姑、小姑愛較捷轉去後頭厝行行看看咧，你像一個桶箍，共一家大細箍甲經經經。

佇阿兄做兵進前，你嫁入來阮兜，彼陣你二十，我五歲。無佸久，阿兄就去馬祖做兵，乖乖的你，毋但著愛忍受翁婿無佇身軀邊的寂寞，閣著奉待序大人、款待小姑。你遵守婦道，無話無句，恬恬仔做，乖乖仔受，莫怪阿爸阿母共你疼入心，厝邊頭尾嘛呵咾你誠好女德。

你欲生第二查某囝的時，是咱兜上艱難的時陣。彼陣，阿兄拄發生意外倒佇病院，阿母愛去共照顧。佇庄跤欲生囝，逐家攞是叫產婆來厝裡接生。你腹肚疼的時，阿爸去叫產婆，干焦我恰你佇厝裡。我彼陣讀國小，無法度體會生囝的艱苦，看你的額頭一直流清汗，我提面巾欲共你拭汗的時，才知影你已經疼甲規身軀必必掣。毋過，你無哼

甲半聲，喙齒根咬咧，恬恬忍受生囝的過程。阿嫂，佇你的身軀頂，予我看著臺灣女性堅強的一面。

阿母中風的時，毋管是反身、飼三頓、洗身軀，攞是你親身咧共照顧，閣做甲誠四序。厝邊隔壁的老大人攞咧講，一定是阿母頂世人燒好香，這世人才會當有遮好的新婦。

這馬，你因為龍骨開刀，拄佇咧復健當中，跤猶袂接力，著愛坐輪椅。毋過，你對小姑的情份猶原閣佇咧，見擺我若轉去後頭厝，你就款一大堆好料的予我載轉來。看車內大包細包的伴手恰你坐佇輪椅送我到門口的形影，你咧共我攞手的時，我的目屎含目墘，心肝內一直喝講：「阿嫂，加油！我相信你一定有法度閣倚起來！」

10 沐手

郭伊貞

做生理的人哪有咧驚沐手，毋管是燙著、切著，攞是真四常的代誌。若是手一下沐著，就代表愛無閒規工的；若會驚垃圾、驚油湯油朥朥，規氣倚佇邊仔，較袂共人鎮地。阮兜是佇廟口做生理的，因仔時看大人佇擔頭無閒趁錢，我恰阿兄、阿姊攞愛鬥擇菜、鬥洗碗。往過無塑膠盤仔，攞是用瓷仔的，有夠重閣有夠油。手若一下提無好勢，共盤仔摔破去，毋但予人罵閣會予人拍，彼是足恐怖的。

大漢了後，爸母猶是咧做油湯，兩個歲頭超過百二歲的欲扞一間店，煮食的物件是百外項，干焦攢料、買菜、挨米、攢搵料……，款東款西到開擔好，會當應付人客上門，就已經冤幾若擺矣。繼落來嘛是那做那袂對同，一半擺仔無拄好，就袂直矣。因為按呢，彼站仔我定定轉去鬥顧店。講是顧店，其實是顧兩個老的，嘛是我咧餬因仔時的記持，倚佇個後壁，看個的背影。我沐甲規雙手，油煙衝甲規身軀，這是油湯擔才有的氣味。

等到較有閨縫的時，阿母會煮一大碗雜菜麵予我食，有時是豬肝麵線濫雙卵，有時是海產糜摻芋仔。阿母有總舖師的手路，做這款點心擔敢袂傷拍損？啊若阮阿爸，便閨縫一時仔就走甲無看見人影，做伊四界遨，等人又閣無

閒規晡久，伊才寬寬仔轉來，手提我上愛食的麵線糊，阿爸「十角——一籊散散」的個性定予阿母唸袂煞。

咱人若手頭有工課咧做，一日一日照起工，生理花花仔，生活過了嘛較袂無聊。希望個莫傷忝，毋通做甲血壓衝懸，血油、血糖傷超磅。無佇個的身軀邊予人真掛心，煩惱落雨會共椅桌潑潑去，霜風鑽骨街仔路看無人；煩惱生理傷穰做無一工的額；煩惱較停仔兩個人敢會起撞突，出啥物代誌；煩惱身體各樣無講，磕袂著遮疼、遐疼，無張持才做一改揣醫生，舞大條的。

我毋驚沐手、毋驚垃儂，因為有爸母的所在就無風雨，風雨佇外口，掃袂到咱的門跤口。個是平凡的人，有平凡人的坎坎坷坷，一世人奔波為生存嘛是為夢想，兩個人四肢手，雙手沐著就做伙共拚落去。